

Dada en Seuilla, diez dias de setienbre, era de mill et trezientos et setenta et vn anno. Yo, Alfonso Ferrandez, la fiz escreuir por mandado del rey. Ruy Martinez. Johan Perez, vista. Johan Alfonso. Johan Perez.

CCXLIX

1333-IX-10, Sevilla. Provisión real de Alfonso XI al concejo de Murcia, ordenando que todos aquellos que tuviesen fortuna de 12.000 maravedís estuviesen obligados a mantener caballo y armas. (A.M.M. C.R. 1314-1344, f. 107v).

Don Alfonso, por la graçia de Dios, rey de Castiella, de Toledo, de Leon, de Gallizia, de Seuilla, de Cordoua, de Murçia, de Jahen, del Algarbe et sennor de Vizcaya et de Molina. Al conçeio et a los alcalles et al alguazil et a los jurados, caualleros et omnes buenos de la noble çibdat de Murçia, salut et graçia.

Sepades que Alfonso Ferrandez Saauedra, nuestro vasallo et nuestro adelantado en el regno de Murçia, nos enbio mostrar por Fernand Garçia, su criado, en commo auedes preuilegio de los que an de tener cauallo et armas que pongades de que quantia los tengan, et uos que lo posiestes de XV mill maravedis; et segunt esta quantia que non puede auer en Murçia de LXXX omnes a cauallo arriba, et esto que non es nuestro seruicio. Et nos sobresto touimos por bien que qualquier vezino o morador de y, de la villa et del termino, que ouiere quantia de XII mill maravedis, que tenga cauallo et armas para nuestro seruicio.

Porque vos mandamos, vista esta nuestra carta, que todos aquellos que fallaredes que an la dicha quantia de los XII mill maravedis, que los contringades, so pena de çient maravedis de la moneda nueua a cada vno, que tengan cauallo et armas porque seades mas para anparar la tierra et fazer las otras cosas que fueren nuestro seruicio.

Et non fagades ende al por ninguna manera, so la dicha pena. Et sy asy fazer et conplir non lo quisierdes, mandamos al dicho nuestro adelantado o a otro qualquier que y fuere adelantado por nos, que uos lo faga asy fazer et tener et conplir et non fagan ende al, so la dicha pena. Et de commo uos esta nuestra carta fuere mostrada et la conplierdes, mandamos a qualquier escriuano publico de qualquier logar, que para esto fuere llamado, que de ende al que la mostrar testimonio signado con su signo porque nos sepamos en commo conplides nuestro mandado; et non faga ende al, so la dicha pena. La carta leyda, datgela.

Dada en Seuilla, X dias de setienbre, era de mill et trezientos et setenta et I anno. Yo, Alfonso Ferrandez, la fiz escreuir por mandado del rey. Ruy Martinez. Johan Perez, vista. Johan Alfonso. Johan Perez.

